

**Nunatsinni Kulturilerisut (isiginnaartitsisartut, nipilersortartut/erinarsortartut, eqqumiitsuliortut, filmiliortartut, atisaliortut/kusanartuliortut, atuakkiortut, il.il) ullumikkornit qanoq piginnaasaqarfii atorluarnerullugit nunarput tamaat isigalugu agguataakkamik aqqissuussamillu illoqarfinnut nunaqarfinnullu iluaqutaasumik inerititaqarnerunissamik uummarissaanissamillu siunertaqartumik atorluarsinnaaneri pillugit apeqquteqaat aallaavigalugu inatsisartunut oqallinnissamik siunnersuut.**  
(Inatsisartunut ilaasortaq Randi Broberg, Partii Inuit)

### **Akissuteqaat**

(Ilinniartitaanermut, Ilageeqarnermut, Kultureqarnermut Naligiissitaanermullu Naalackersuisoq)

Siunnersuuteqartumut qujavunga siunnersuummut matumunnga ullutsinni pisunut tunngalluinnarlunilu soqutiginaqisumut.

Naalackersuisut ukiuni kingullerni 35-ini politikikkut aammalu ilinniartitaanermi periarfissanik pilersitsiortornertigut nunatsinni kulturikkut pitsaasumik ineriartornissamut aqutissiuussissapput. Taamatullu ingerlatsinerup kingunerisimavaa ukiuni makkunani ilinniarsimasunik inuuniuteqartunillu eqqumiitsuliortoqarnerput, ullutsinni nuannaarutigisinnaasatsinnik. Tamannalu tulluusimaarutigalugulu nuannaarutitigissavarput.

Naalackersuisut isumaqarput ullutsinni inuuniutigalugu eqqumiitsuliornermik suliaqartuusut kulturikkullu namminneq piumassutsiminnik ingerlatsisuusut periarfissaat tamakkiisumik iluaqutigingikkigut. Minnerunngitsumik meerartatsinnut inuusuttortatsinnullu atatillugu ineriartortitsinissamut periarfissat eqqarsaatigalugit, aammali ilinniartitaanerni inuiaqatigiinnilumi ataatsimut isigisumik eqqarsarluta.

Piviusuuvormi ullutsinni inuiaqatigiinni innuttaasut ilarpassuisa inuiaqatigiit kulturikkut sunngiffimmilu sammisassaqtitsinikkut periarfissiissutaannik killeqartorujussuarmik periarfissaqarfigigaat, imaluunniit ilaatigut allaat periarfissaqarfigingikkaat. Naalackersuisut isumannaarniarpaat pitsaanerumik nunap immikkoortuini assigiinngitsuni periarfissatigut nikingassutaasut piiarneqarnissaat, inuiaqatigiinnut kulturikkut neqeroorutaasartut eqqarsaatigalugit. Kulturi eqqumiitsuliornerlu innuttaasunut qaninnerulersinneqassaaq.

Naalackersuisut ullutsinni piorsarsimassutsimut eqqumiitsuliornermullu tapiissuteqartarnermik aqqissuussinikkut periarfissanik aqqissuussisimapput eqqumiitsuliornermut kulturikkullu suliniutinut tapiissuteqarfigineqarsinnaanermut qinnuteqarfiusinnaasunik, nunatsinnut tamanut atuuttumik, taamaaliornikkut nunatsinni tamarmi kulturikkut aqqissuussinernik ingerlatsisoqarsinnaangorlugu. Taamaakkaluartorli eqqumiitsuliornikkut kulturikkullu aqqissuussinerni ingerlanneqartartunit misilittakkat takutippaat nunatsinni sumiiffinni assigiinngitsuni atuisut avataaneersunik eqqumiitsuliornermik ingerlatsisunik tigusinissaminnut piareersimasanngitsut.

Naalakkersuisut kommunit kaammattorumavaat periarfissat malersoqqullugit, assersuutigalugu Nunatta isiginnaartitsisarfia isiginnaartitsisarnissanut isumaqatigiissuteqarfialugu, kiisalu illoqarfinni nunaqarfinnilu kulturikkut sunngiffimmilu sammisassaqtitsinikkut iliuusissanut pilersarusiortarnertigut.

Ilinniartitaanikkut anguniakkat Ilinniartitaanermullu pilersaarutip II-ip suliarineqarneranut atatillugu ukiaq manna workshops-inik arlalinnik ingerlatsisoqassaaq, - tamannali pillugu inatsisartut katersuunneranni matumani arlaleriarlunga oqaaseqartunga tusartarpassinnga. Qaammatip naanerani meeqqat atuarfiat pillugu workshop-imik ingerlatsisoqassaaq, tamatumunngalu atatillugu borgmesterit qulequtaq taanna pillugu aggersarsimavakka. Tamatumunngalu atatillugu kaammattuutigissavara kommunini meeqqat atuarfiat pillugu peqqussummi § 35, imm. 2-mi periarfissaq iluaqutigineqassoq, tassanimi allassimammat, issuarpara: "...Inuit immikkut piginnaassusillit atuartsissutini ataasiakkaani atuartsisinnaapput."

Tamannalu inatsimmut oqaasertani nassuiaataasuni imaatut inatsisilerneqarpoq, - issuaqquppunga... Tamatumani pineqarput nipilersornikkut ilinniakkat, inuit tamatumunnga naleqquttunik ilinniagallit, imaluunniit tamatumunnga naleqquttunik piginnaanillit, assersuutigalugu assassornermik ilinniagallit, eqqumiitsuliortut aamma nipilersortartut ilinniartitsinermik ingerlatsissinnaasut...". Sumiiffinni eqqumiitsuliornermik ingerlataqartut kulturikkullu suliaqartut allat piginnaasaasa iluaqutigineqarsinnaanerit periarfissaareerpoq, - tiguinnagassaavoq.

Eqqumiitsuliornikkut, kulturikkut sunngiffimmilu sammisassaqtitsinikkut ingerlatsineq piomassuseqartumik ingerlatsiffiusoq tamatta ataatsimoorluta akisussaaffigaarput. Naalakkersuisut nassuerutigissavaat kulturikkut sunngiffimmilu sammisassaqtitsinikkut aaqquissuussineq maanna atuuttoq 2002-meersoq nutarterneqarnissamik pisariaqartitsimmat, - inatsisiliornikkullu agguarneqarnissamik, - kulturikkut inatsimmut, sunngiffimmilu sammisassaqtitsinikkut inatsimmut, - taamatullu avitsinissamut soorluuna piffissanngortoq.

Inatsisartut 2014-imi upernaakkut ataatsimiinneranni Naalakkersuisut kulturikkut anguniagaat saqqummiunneqassapput, taakkualu suliaqarfimmi uani inatsisiliornikkut nutarterinissamut tunngaviussapput. Naalakkersuisut siunnerfigaat eqqumiitsuliornikkut kulturikkullu inatsisiliorneq, inuiaqatigiit kulturikkut eqqumiitsuliornikkullu pingaarnertut akisussaaffiinik aalajangersaasoq, kiisalu Naalakkersuisut kommunillu kulturikkut politikkimi immikkut akisussaaffiinik erseqqissaasoq.

Taamatut oqaaseqarlunga nuannersumik inerititaqarfiusumillu oqallittoqarnissaa kissaatigissavara.